

雲間據目抄

褚克明題

雲間據目抄

沈節



民國戊辰五月
奉賢褚氏重刊

雲間據目抄序

往余受業博士讀諸家草至范叔子一家言汪洋自恣軼輓近而遊高明有味乎其言之哉已余對公車避存吾丁明府稱述叔子義甚高放達而多奇好修而倬詭與其文合私心愈益向往比令海上得交叔子歡則見其人森森乎如開玉府僊僊乎若乘白雲而行廣漠蓋非天壤間恒有也未幾余以苦次去叔子送余黃龍之浦慙勤贈言把衣惜別歛歔久之吳中信多奇士第得叔子靡論其他迺今令秦中目皆傖父拊缶而歌嗚嗚當是時思一見叔子若醴泉甘露安可得也而公覲章丈適携其所撰雲間據目抄屬余弁諸簡首夫空谷聞足音輒喜矧讀其書奚啻趫然欣躍而爲之序按據目抄凡五紀曰雲間者就雲間一郡之事書之也曰據目者爲一郡實錄必目所睹記則書之也叔子生於嘉靖庚子

雲間據目抄

序

自十齡以外涉世凡四十餘年其間人文之高下習尚之污隆財賦之增減與夫災祥薦至土木繁興其爲時屢遷其爲變不一顧郡乘闕久矣不有紀述百世而下徵文獻觀理道者何以考諸此任世道者所宜深念也叔子早謝學宮與世齟齬其負抱瑰瑋不獲自試遠迹江湖放情魚鳥有慨於衷寓目卽書其事核其詞辯其論侃侃博綜一郡之典章而昭數十年之鑒戒概於立言君子叔子信不朽哉喆士懷奇抱異不得感會雲龍遭佐明主樹竹帛之勳而徒循尺寸以希有聞曷若托千秋而垂太業夫馬之喻叔子蓋辨之矣先是所著有空明子八篇詆訾當世或病其過激余謂叔子憤世之士遇事感發不能避諸筆端然皆天下之公論若以意愛憎妄溢好詞曲加醜詆叔子無是也尙論者諒之

萬曆癸巳孟春賜進士出身知三原縣事獲嘉高進考撰

雲間據目抄目錄

卷之一

人物

卷之二

風俗

卷之三

祥異

卷之四

賦役

卷之五

土木

雲間據目抄

目錄

一

紀人物

昔者太史公謂由光義至高獨惜其文詞不少概見而孤竹二子乃幸其賢于孔公聲施後世嗚呼其旨深哉故豪傑之士能以功名表見彪炳史冊所謂才與遇合者也其有數奇運蹇特立獨行或功與勢違或名與時背如屈子自沉伍胥賜剄甚且困阨蓬纍曾不得借君侯階前盈尺之地一吐其奇而賁志以沒若此類者亦可悲矣向微逸史氏闡發幽潛以備載筆異日或有采風者尙論其人何以稽焉故予紀四十年來郡以內所睹記人士皆就其不得志於時者摭拾行畧而次第之以俟後之君子無由光之憾云

吳稷

吳稷字舜弼號石湖公穎敏敦愨年十五居父喪戚而有禮治經屬文精勤雅贍舉正德甲戌進士授金華府推官時蘭谿章文懿公家居公虛已質疑政學並進會永康右姓馬甲辱其邑令公據法繩之拂上官意移調惠州得與魏莊渠李谷坪兩公切磋守官冰檠裁省冗役冗費暑月行縣疎釋繫囚置規過櫃于郡門以通民隱立保甲法于七邑以懲奸宄中丞聶榮襄移文諸郡期一如吳惠州有海豐令以墨黜猶治事公露檄馳使逐之令爲按君鄉人乃大迂不得薦遷

荆府左長史服除改徽府公皆不薄其官進賢王箴芸窓賦以寓規誨致仕歸老于東城之垞非公事跡不履廛有司延鄉飲大賓間一赴之服膺莊渠谷坪兩公求仁致知之學四十餘年潛思實踐間有疑信者則與

唐中丞順之陸宗伯樹聲參互演証年逾大耋猶著行壽編以自勗卒後數月督學耿公登堂奠謁旋採輿評秩祀鄉賢祠所著有自園稿宦游稿石湖漫稿破愚錄史綱纂要藏于家而皇明正學編猶裨道脉云

馮恩

馮恩字子仁號南江由嘉靖丙戌進士以行人出勞兩廣大帥王文成公因薦束脩爲弟子文成公甚器之已擢御史分司留臺先與刑曹抗論執訊獄牒體尋疏論留守魏公不得越江役衛卒時汪御史大夫鉉愎而險能窺伺上旨沮折其屬又阿諛時相數更職守自固公疏論之有身軀不滿五尺罪惡貫于四凶之句會上方喜新貴人議分建南北郊又欲令皇后出蠶北郊而擿其不合者以邪徒闢之中外惴惴公獨抗疏援古親蠶郊祭之禮極陳時

政乖違災變勸上速停二議開言路且以堯舜之用元愷而唐宋之徇林甫安石爲戒當公具草時分且得逮後俱報聞公益感奮會彗星見東井遂抗疏論汪鉉爲腹心彗并及二相臣宜亟罷復倣范希文百官圖例悉品諸大臣得失詞甚峭厲上怒甚馳緹騎逮之下詔獄適汪大夫遷太宰以例會審南闕門汪執筆令校卒持公轉膝面之公卽起立不跪辯甚強項汪遂以上言大臣德政律署公情眞法當斬公挺身出不顧觀者皆嘖嘖歎曰是御史鐵膝鐵口鐵膽鐵骨相傳爲四鐵御史且錄其語流播中外及冬當就法有遣公藥者公曰御史陳事不當惟有伏刀都市申明主三尺耳何以藥爲後得減戍雷州後赦歸雷人祀之十賢堂以配宋寇準李光輩公材大蚤廢居恒慷慨謂猶可爲德于一鄉出橐貲買瘠田募貧人佃之教以計然之策會有天幸旁畝益拓所入漸

廣乃推贍三族之貧者若干人又贍布衣交貧者若干人會倭亂有士女避徙者公皆授廬佃饗以濟之大飢疫煮粥劑藥所全活甚衆穆廟初御極旌諸言事者公年七十餘矣銓曹難其老疏進大理寺丞再加朝列大夫死之日弔者如市郡邑大夫請祀鄉賢所著有藹蕘集行于世

周思兼

周思兼字叔夜號萊蜂公年十八爲諸生才氣橫溢下筆千言不能休常爲古詩歌陸文裕公見而奇之曰吾年二十發解時不辦生此語舉嘉靖丁未進士授平度州知州多惠政時藩府閹縱奴奪民產有僉事某者捶其奴斃之獄閹嗾王奏之將擬重辟當道檄公再訊僉事竟得如故官旁郡飢民掠食幕府將加勦公曰此輩赤子飢求食耳奈何激之爲變亟作小木牌數千爲招輯語散

置四郊皆得就撫爲良民銓曹因攷公治行最擢繕部員外督廠清源州人遮道哭送立祠生祀之在清源會河勢將決公爲禱于神募民囊土築堤身立赤日中督之堤成三日而秋漲大發民得無魚乎之患已擢湖廣僉事除宗庶五將軍豪橫殲巨盜劉某于江黃間聲稱尤籍會丁內艱前後哀毀雞骨服除竟不復仕優游林泉者逾七年足跡不入官府屬歲飢食指不給閉門食貧終不爲人關說一事時或操小艇携圖書數卷游吳越佳山水間絕不令人知其他隱德不可勝紀廟堂方大用公超拜廣西督學副使竟遭脾疾卒朝野惋歎諸生請祀學宮因私諡公于鄉曰貞靖先生公文駕軼蘇長公詩歌類太自己稍出入歐曾詩宗王孟善行草兼工小畫所著有西齋日錄學道紀言及周叔夜集行于世范叔子曰陳仲子三咽井李以名行自持亦苦矣孟軻氏猶斥其

矯廉何刻哉晚世薦紳營營逐利雖有陶朱猗頓之富日事干請如飢犬乞憐甘爲有司褻慢當此之時得一陳仲子者豈不猶然稱巨擘哉迺有閉戶食貧如萊峰先生者在也嗟嗟哲人既逝我將安放其先生之謂與

包節

包節字元達號蒙泉舉嘉靖壬辰進士公孝友天植忠義性成秉道嫉邪毫髮不假兩使滇閩再按湖南能令豪右權奸屏跡斂手風裁凜然會忤奄豎誣以震驚陵寢謫戍莊浪衛者十有二年聞母弟殞謝哀毀而卒識者惋歎公文宗西京五七言詩有開元風骨皆窮而益工莫方伯如忠比之虞卿云所著有包侍御集六卷范詩類選三十卷行于世

范叔子曰節與弟孝時稱兩包卽予同里人也家君嘖嘖道其少

年讀書事甚悉然兩公皆奇才博學相繼脫穎並爲國朝名御史迹其一時詎不赫赫稱盛哉乃兄以戍客死弟以病歿折竟不得收善後遐齡之慶豈亦天道忌盈與此昔人所以喻塞翁也邇者輕猥謏劣之子幸廩學宮遂多盛滿嗚呼孔公傷器小有旨哉

張之象

張之象字玄超號王屋公爲人體貌傴僂如不勝衣而剛腸勁氣獨立物表平居議論臧貶務持正不阿與人交不以盛衰爲軒輊常憤時俗趣炎乃反傳咸意著叩頭虫賦以見志單門後進少有拔俗之韻必多方延譽其敗名傷檢者卽顯赫亦擯斥不少假邑有董氏者其後輩貴盛躔直而尊行某故櫛机也偃然執分自倨其後輩不能平遂指爲張姓訟而斥焉公心異之爲賦一詩云秦庭未省非張祿漢室原知是董生相傳以爲絕倒後訊者竟據此

剖其事公富於學故其詩之工緻多類此自謂一生不欺暗室常
渡泖中流風惡舟人皆失色公神宇恬穆口占一絕有暗想生平
何所懺三辰晏起一科頭之句公旣性不偶俗獨喜閤戶著書冬
夏不輟其詩爾雅冲淡有魏晉風其文閱深奧衍出入東西京床
頭惟擁千卷終身不識銖兩會計以故家徒壁立間從諸貴人遊
或羅綺滿坐公獨敝衫竹躋披襟命塵旁若無人盖公所挾持者
甚重不在世味中也海內名卿鉅公聞名願交者望如景星四明
豐存禮豪士也讀公文詫曰天生老豐何復生此子邢子愿東魯
逸才生稍晚意公已化去後行部至松喜公尙在數存之里巷爲
置買山錢若干其他先輩若金陵顧華玉璘許仲貽穀吳門蔡九
逵羽文徵仲徵明王履吉寵彭孔嘉年吾鄉徐伯臣獻忠何元朗
良俊董子元宜陽皆與公爲莫逆交墳簾一時此可知公臭味矣

公常稍從祿仕爲浙藩幕卽謝去卜築秀林山麓其地多怪石清
泉烟扉月榭叢竹茂林及諸仙釋名蹟苔射蘚沒舊無物色者公
一一題詠山靈遂爲生氣所著書及纂輯先代書不下千卷藏於
家公有子諱雲門登隆慶庚午鄉薦先公卒孫齊顏弱冠領萬曆
乙卯薦奇才潔行卓犖一時人以爲公厚積之報云

董宜陽

董宜陽字子元先世汴人南渡徙居上海吳會又徙居沙岡人稱
紫光先生復自號七休居士公于書無所不窺獨究心當代典故
郡文獻游太學名動都下屢試弗第遂棄去制舉業工古文詞詩
法高岑晚嗜元白體文法先秦間出入曾王家楷書倣永興行草
法智永生平嗜好惟書史古石刻名帖日坐一室手丹鉛校勘至
丙夜不休與同里張玄超徐伯臣何元朗號稱四賢所游海內名

人卽顧司寇璘文待詔徵明許奉常穀輩卓然以文名家尤敦尚行誼與弟宜旭分產先爲文泣告先祠推故產悉讓弟而身任一切門外事先廷尉有故人開府婁江公奉書往謁開府迎公甚恭幕下客願以金錢爲壽居間有請公面叱曰若視我何如人哉拒不納故家世臚仕而落落如寒素云所著有名臣琬琰通錄金石錄雲間詩文選畧先哲金石錄近代人物志雲間百詠松誌補遺上海記變中園記金石林諸書藏于家

范叔子曰予讀唐史見溫彥弘將改葬祖父筮者曰若葬茲地當害兄而福弟彥弘曰若得家弟永康我當含笑入地矣嗟嗟兄弟之于人大矣哉古人何乃不有其身而有其弟與紫光先生以文學名不足多獨其友愛宜旭弟爲文告廟推讓故產此豈輓世人情所能耶庶幾與彥弘相上下者乎

徐獻忠

徐獻忠字伯臣號長谷公學博才高日讀書盈寸爲文深厚典據大類子長間襍東京所論詩五言重魏晉七言止取高岑而上律止于大歷而自爲詩沉鬱彩秀出入諸名家尤長于賦如布賦一篇憫念松人愁苦周委詳盡能令循吏讀之酸鼻生平無他嗜好惟著書自娛有金石文樂府吳興掌故錄唐詩品水品四明半政錄洪範或問春秋紀傳錄大易心印四書本義及分節叅同契大地圖行義山房九笈三江水利攷等各自爲集藏于家眞草書法蘇趙爲世所珍由鄉舉授奉化令以氣節自持不能折腰俗吏時同鄉沈鳳峰愷爲副憲公與節推楊樞爲屬吏樞先謁愷愷命侍坐適公入趨南坐不少遜愷意不懌公怒曰而豈以我不能爲陶彭澤耶後公坐誣挂冠愷有陰擠焉公厭松俗侈靡卜居雪川郡

侯袁汝是重公學行每嘆泖峰佳麗不能容徐公高隱爲恨云

何良俊

何良俊字元朗號柘湖公綺歲從經師游即厭棄制舉業耽嗜古文博綜九流研味四始兼抱經濟思效一官竟以數奇僅拔貢太學宰相憐其才起家拜南翰林孔目甫考滿卽謝官歸縱浪烟霞水石間覃志著作文法劉向馬遷詩宗蘇李而近體高岑晏息處皆名四友齋四友者維摩詰莊生白樂天與公爲四也公自爲記及書屏示客與王左輔趙中丞兩書皆公生平實錄晚嗜聲伎絲竹寢興必先奏樂非過自奉乃其所期待者不淺耳與弟進士公良傳時稱兩何所著有何翰林集何氏語林四友齋叢說行于世范叔子曰張董徐何雲間所稱四賢也其以文學行誼倡和一時詎不偉哉令此四賢者出入金馬門爲玉堂仙子誰曰不宜乃幸

則爲折腰吏不幸則爲老縫掖使天而可問乎此曷故焉而魏科
臚仕往往畀之謫才涼德之夫噫茲所謂命耶

馮行可

馮行可字見卿號邾齋卽御史公恩長子當御史下獄時公甫十三歲卽伏闕上書白冤狀括髮短後衣弊蹙長安街中見一要官輿過卽攀跪泣請其詞絕酸楚不忍聞皆掩耳促舁者疾過之又二載會冬事迫乃刺血書疏叩闈大畧言臣父恩幼而失怙母吳含飴哺之以長成有今日不幸私憂過計欲爲陛下作吠奸之犬而忘逆鱗之戒遽陷大辟竊念祖母吳已八十餘憂傷之深僅僅氣息臣父今日死祖母當以今日死臣父明日死祖母卽以明日死臣父死臣祖母復死臣煢然一孤寧得不死惟冀陛下哀憐之縛臣置辟而赦臣父得以苟全母子二人之命陛下僂臣不傷臣

心臣被僇不傷陛下法謹延頸以俟白刃納言陳經見而憐之爲封上有旨法司更審御史公遂得減戍雷州海內翕然稱馮公父死忠子死孝云甫弱冠舉嘉靖庚子鄉薦家居時佐御史公爲義已丁母金孺人喪蔬食不入內者三載穆廟初部使者列上前事特旌爲孝子表其廬公博學瞻文竟以蹇數久因公車謁選得光祿署正擢應天府通判所至有惠政而清操若冰蘖人稱不愧馮御史兒已擢貳守致政歸杜門養高絕無私謁日以孝友之道誨其子弟卽鄉閭後進皆仰公爲師表部使者屢疏起用公不就朝命公爵秩復旌其門時稱異數云有子大受領萬曆己卯鄉薦方以詩文雄傑時流且日樹隱德故馮氏濟美遂爲東吳之冠

李豫亨

李豫亨字元薦少穎異十餘齡從父海樓公官游湖襄會剪大瀉

寇公從旁籌策一座皆驚客歸補郡博士已入貲爲國子生卒不第授鴻臚序班時新鄭當國公條上國計三議新鄭深器之欲大用公公無宦志歸築室西湖上與龍溪王公講學多從游者抵武夷生徒益衆公自五經子史旁及山川象緯兵農財賦醫卜堪輿暨二氏之學咸窺精蘊所著書有推篷寤語自樂編三事遯真格致明辨自樂窩詩草梅花百咏所輯書有寒谷回音藥籃春意廣記攬玄珊瑚枝摠若干卷工署書行草具體趙承旨有石刻行于世

范叔子曰國朝以制義取士士卽長于制義亦卑卑腐語耳幸與的者曰甲科輒侈肆尊大令不由此途進雖周孔之德游夏之學亦敝帚矣元薦窮百氏家言不下五車竟阨于一第俗吏猶然以貲郎目之噫貲郎豈皆讀元薦腹中書者耶彼俗吏何以當甲科

也

楊允繩

楊允繩字翼少號抑齋舉嘉靖庚子鄉試辛丑下第往受業唐荆川先生講良知之學日置黑白二圈以志善惡卽昔人投豆之說其精進力行類如此甲辰成進士以行人擢兵科給事中時分宜嚴嵩當國公首上簡輔臣廣錄用以隆治化疏尋劾勳臣本兵之不職者又歷上拯弊安攘諸疏言中理竅已奉詔册封河南王府遂乞歸計不復出會倭亂憤激時事趨駕還朝卽抗疏數千言內及閣部大臣餽送不訾蓋指嵩相言也嵩啣之適巡視光祿有寺丞胡膏者嵩客也公廉其貪污虛冒物價狀劾之下法司嵩旣無計免膏又切齒公乃嗾膏反誣公譏訕嵩從中灼之世廟震怒廷杖下錦衣獄擬絞在繫者五年嵩患之因星隕如雨占者以天示

變咎在臣下不忠遂列公名上請刑以應庚申十月朔公遂赴西市朝野冤之先是公家居性行峭直無所避一郡佐峻行敲扑適公過聞號呼聲立假其榜給云將以懲奴輩不當意者佐爲懼息郡侯方廉送別公亟言志在退休公正色斥之曰公不欲做官元旦不當晨趨姚醫士門賀節矣姚故徐司空達齋客也方面頰不憚而退嵩子世蕃驚縱邀公飲有二客皆朝紳不速而至世蕃令兩童子持朱墨筆點其面爲闖席者戒公默不語世蕃深啣之竟以此賈禍語云太剛則折楊公有焉公有子曰應祈性至孝當公下獄時前後三草疏最後走平坡山中鬪靈芝三本將獻上請代父死會世廟不測皆爲母黃孺人所阻乃身服皂隸衣行長安街毀容骨立念未舉子姑以藥餌自扶已得今孝廉公忠裕甫三日覘知給諫公禍不解入獄永訣絕食而卒聞者莫不失聲越三年

分宜難作又四年穆宗御極推諸言事者贈給諫公奉議大夫光祿寺少卿諭祭一壇廢忠裕爲國子生又用李都諫用敬言逮膏抵死迄萬曆戊子忠裕領鄉薦聲籍籍士林人以爲忠孝之報范叔子曰上山不避猛虎下海不畏毒蛟烈士不當如是耶諒哉吳中丞之銘公也雖然謂天有知何刑公之生而又夭其子謂天無知何錄公之歿而又榮其孫豈其理之不可信耶雖然不僂公忠不盈嵩惡嵩彌盈公忠彌著嵩也遺穢公也垂芳孰謂天之成全公者無意哉

抑齋公在告時有日者對陸宗伯曰楊公爲門下同年其命當死國難公勿勸之出宗伯曰此公已無宦志安有此日而言誤矣一日楊公忽投刺別宗伯還朝宗伯心動且知公意已決不可復阻猶幸星術未必奇驗也已聞變宗伯時爲憮然悔不宛

雲間據目抄

卷一

十

引日者言力挽之

龔情

龔情字善甫號方川公生而穎喆髻齒能日誦記千言舉嘉靖癸丑進士授行人奉使景寧藩邸峻卻餽遺擢禮科給事中值歲議軍興北胡南粵諸道赤白囊旁午警報歲數失稔公首疏飭邊防預儲蓄蠲南北額外之徵均兵餉以蘇偏累復疏上詔取太倉銀兩省中推公敢言會勘伊庶人不法狀忤當事者指摘貳德清尋歷陞南虞部郎報罷公少日聘韓氏已其女邁廢疾或諷公改圖公不聽竟其女亡始議婚其大行端謹類如此性喜博古屬文著作宗韓非子有撮殘稿藏于家

龔愷

龔愷字次元號全山第嘉靖丁未進士卽給諫公從弟時稱兩龔

授慈谿令視職廉慎治釋神明去縣日民攀留者遮道至截鐙去入臺試御史會咸寧侯仇鸞倡馬市公首署疏論之杖闕下得不死已按西粵吏不職者先望風去尋列靖江王不法狀疏上大征粵寇爲當事者忌出爲山東參議多惠政晉湖廣副使以疾作引歸杜門不事私謁郡邑大夫造請必爲指詰疵政靡不屈服公雖峭直清嚴待族黨外戚務敦厚道識者稱公爲古之遺直竟以考察降調交口寃之

范叔子曰吾郡自嘉隆以來其以兄弟掇巍科爲望族者何比比耶獨兩龔在臺諫並諤諤有聲居鄉亦稱兩君子卽以功名相終始奚愧焉乃竟坐誣挂冠而家聲亦不永世身歿未幾子孫多寥落鮮克自振者豈盈虛之數有定耶語云天道無親常與善人豈欺我耶

王相堯

王相堯字師舜號容齋公生而岐嶷音吐若鐘早歲卽爲陸文裕公所器補博士名鵲起已入貲爲上舍公于書無所不窺尤究心國朝典故及濂洛關閩之學時分宜爲祭酒叩公經濟迎刃而解故于諸生中絕憐愛之一日選從比部郎恤刑河南公舉歐陽崇公語我與死者求生求生不得我與死者兩無憾以微諷比部時有一用斧殺人事公潛以用字改用字曰姑易一字以全一命乎其宅心仁厚如此嘉靖癸丑島夷內訌上海議築城巨室以廛價高多梗議公獨奮然先撤屋輸地于官城完公破產居多囊貲亦罄公遂絕意進取關一舍題曰容齋日箕踞吟咏其中常曰我無他過人獨于人無所不容事至物來理恕情遣訐侮寤及我哉人以是服公度量公學博行高乃以數奇屢蹶當分宜柄國或勸公

往謁美官可立得也公愀然曰士固有命吾豈以干謁取榮耶後世廟登遐覃恩宇內部使者列上公行例授銜河南光州判從公卹刑有惠政故也壽考而終海上稱爲耆碩

董體仁

董體仁字元善號海觀以子貴封南京工侍郎公沉毅博洽早歲試博士輒高等竟蹇一第年四十餘應補序貢推讓其同儕之老而貧者士論咸高其義時公伯子傳策已成進士直聲振海內恬淡自如一不爲意每憐族黨貧苦爲置義田若干贍之有范希文之風焉仲子進舉隆慶丁卯薦季子傳文廩學宮皆一時名士

袁福徵

袁福徵字履善號太冲公誕時封公夢狀元錢福造其第故名福徵初號潛冲一夕公夢左思語曰君卽我後身也因更號太冲束

髮廩學宮舉嘉靖甲辰進士初比部主政論北地囚庚戌晉爲郎會虜大入寇肅皇帝誅丁大司馬怒諸曹郎公袖短疏疏職方郎王某無罪奉旨編爲民去遂名動公卿間已出守復州里役負魚課者祖孫繼死箠楚下公捐羨鏹立出之移貳齊安其屬邑麻城有柴山連亘二百餘里劇寇萬種公潛師夜進悉殲之民至今立祠祀焉會丁父艱服闋起貳隴岷岷迫西番夷公以孤臣走萬里絕塞一意拊循甫五月左遷傳南陽王王甫辮髮大國母垂簾諸軍校爲豪魁者乾沒莊邸孱弱不能令公至則搜剔奸蠹悉按以法人不敢犯藩府故事有左右長史視殿閣臣有正副承奉視司禮監承奉員缺例于府中以次補陞疏名奉請無自內出者兩闈豎某某詐爲王疏以聞下宗伯覆議令之官非特旨也公廉其實具揭科部及撫按兩臺題叅僞狀縛詣闕庭杖之以是忤中貴褫

職歸居恒日以詩文棊酒自娛凡里中顯晦少長皆爲忘年忘分之交絕無軒冕俗態時客游吳越金陵佳山水間終歲忘歸與太倉王元美北地李于鱗並馳名海內元美常贈公以詩曰蒼顏此日圍棋叟青鬢當年同舍郎出僅一身何假錘行逾千里不賈糧永論錙素皆親屬纔得湖山卽故鄉似爾蕭疎吾亦易檻猿籠鳥更茫茫眞得公實錄云公文法顏延之詩具體杜工部行草得蘇長公眞趣有著作數十帙藏于家

張仲山

張仲山字仁卿號五鹿公雋資邃學爲先輩徐獻忠所推穀食廩學宮有聲性至孝所授弟子束帛卽以備旨髓奉親伯仲君皆食貧公推父產之腴者贍之而以瘠自居已伯仲中廢并取瘠者公亦不爲意伯常以逋被繫公色動曰吾壁立且甘之耳忍繫兄耶

傾囊出之待宗族姻黨務敦厚道所教授弟子皆爲名士有西河之風識者咸期公爲大器竟阨于例不及貢有司數上公材行部使者相繼下書旌其門邑令屠長卿輩延爲鄉飲大賓同志者播之詩歌以彰懿美有紳裾誦義錄

范叔子曰予讀唐史見牛弘弟弼嗜酒而酗射殺弘駕車牛夫人迎謂曰叔射殺牛大是異事弘曰己知讀書自若嗟乎有兄如此雖有長舌將安施焉余觀五麓君推恩伯仲有古人風而朱孺人率能以義佑之其子善又能世公家聲提身淳厚如受徐長孺托孤周旋懇至卽朱文季不負張堪知己之言見後漢書周仁榮善體楊公道假宅之意見元史曷以尙焉故予觀五麓君之刑于而知其賢于人遠矣

楊有爲

楊有爲字後可號九南舉嘉靖己酉鄉薦公處奔競紛華之世獨能狷介自持壬辰長至日前邁微疾沐浴更衣而逝以貧不能葬孝廉張齊顏爲文求助于郡中縉紳其詞曰廉侔陳仲貧過原思生平惟守一編家業空餘四壁足絕公署當道至不識其姓名高臥窮村交遊莫得望其顏色甯甘凍餓特耻干求生之年常并日而餐死之日至藁棺而斂又况天平不吊終奪伯道之孤室有未亡堪憐黔婁之婦凡我同類誰不關情擬捐厚賻之資以儲薄葬之備言言皆公實錄讀者哀之

莫雲卿

莫雲卿初名是龍字廷韓號後朋卽方伯如忠伯子也公賦質岐穎蚤歲能屬文日誦記數千言稍長卽攻古詩文詞賦有倚馬才律宗杜工部文法西京尤長于書畫行草得米南宮真趣間寫張

旭畫宗黃公望皆爲世所珍公性豪舉不拘小節嘗嗜弈終夜較不倦有相知好雅潔者邀坐斗室中焚香煮茗兼供佳膳輒置饗亡歸與先輩文徵仲唐伯虎臭味相埒絕無松人俗態以拔貢爲國子生名重都下歸則杜門著述不事干請生平矜恤貧士傲睨富貴人間或陰植親友亦絕不令人知方以學行立幟吳下倏邁疾而亡聞者浩歎所著有筆塵及廷韓集藏於家

范叔子曰廷韓以曠世逸才竟蹇一第時或使酒罵坐以舒不平予嘗從間解之曰足下抱千秋業當是宇宙內第一等人何有于此輩啄腐鼠嚇者哉廷韓深服予言時過辱推獎一日吳門王伯谷薄暮抵諸宜甫齋頭宜甫邀予陪飲有兩春元不速而至同席久之聞暮鐘將散去適廷韓泛酒龍潭歸頗有意宜甫因携一妓及諸友偕來擬取醉遇伯谷兩春元若不懌甫舉杯忽把予臂語

伯谷曰足下知吾松此君乎伯谷云與予善廷韓曰此君食貧苦學坐中富貴人不足敬可敬者此君耳予復戲解之曰莫大得無酒痴作故態耶嗟嗟今雖欲再覩廷韓狂態不可得矣故廷韓死予每哭之失聲廷韓生平鄙牙籌會計惟蓄圖書數千卷及古名人字畫數千幅年甫半百倏焉長逝肉未寒妻女遘暴疾一日以死僅遺一孤瑩瑩子立幸長女適潘方伯季子雲駸卜地海上葬之著作多湮沒不傳嗚呼何天之不仁于廷韓乃爾哉

朱朝貞

朱朝貞字孟元號中宇家藏宋譜乘實晦翁先生之裔公王父諱昂者以平蠻奇功爲武廟時名御史父孝廉公諱承祊者與郡中莊小山周萊峯二三先生締筆研冰檠之交鄉薦四十餘年囊橐如洗公淵源家學少爲邑庠南雍宮弟子聲噪起數奇九躋棘闈

嘆曰大丈夫安能雌伏然何可奪司命者權吾每寤寐李永和擁書萬卷不假南面百城也遂棄去公車業窮日夜爲囊帙蠹魚兼咀茹釋氏諸書間與衲子話無生或偕騷選侶勝唵眺偶及著作曰文必東西京可無辱子墨客卿詩必開元大歷可無卑宮商乃其才足辦耳爲人悃悃坦衷然落落寡合不喜遨遊大人先生市蜉蝣之譽嘗謂古逸民如冥鴻野鶴莫可籠罩今奈何林泉于朝市煦濡于軒冕此又何如終南捷徑耶乃著胡盧篇以見志并踏雪草蛟賦行于世武丘吟草瑣言織履集藏于家

俞顯卿

俞顯卿字子如號適軒成萬曆癸未進士授刑部主政公邃于理學提身嚴毅早歲舉孝廉卽留心民瘼有范希文先憂後樂之志穆廟末年奸民誣告絕田牽連騷擾幾至煽亂公爲呈詞令耆民

羅奉等抄呈巡撫張佳胤具奏停止民賴以安已公立朝會一勳
戚與公同官者褻慢不經公抗疏論之坐誣挂冠家居杜門清修
敦尚孝友執父喪蔬食三載復鬻園以成葬禮士論高之
范叔子曰始于闡鄰卒于金虎果哉先民之畏比周也公獨不念
此乎且夫肩鴻鉅者必有所忍及克有濟公不能隱忍于一時以
須公論之自定亦亟矣哉雖然天下無兩是亦無兩非以公之疏
而黜其人卽以公之疏而并黜公也果孰是而孰非耶時事可知
矣

徐益孫

徐益孫字長孺號與偕公少孤十歲喪父奉貞母陸孺人教日下
帷讀書厥有成立年十七補博士已入游國子名傾都下所至公
卿大夫比于黃叔度云事母至孝居恒教授弟子束脩皆以供肥
羹母死遂絕意進取捐太學符繻焚之示不復出結廬墓側昕夕
悲慟郡邑大夫請上其事以旌異公辭益力其奏記有曰益孫旣
賴母以成身當立身以報母不能揚名以慰母何忍借母以竊名
未能從殞以是偷生莫可抒哀敢希幸進反覆三思只欠一死讀
者比於陳情表云年末半百而卒衆共惜之

陸郊

陸郊字子野號三浦公貌古行高常貧不自給怡然趺坐讀書臨
摹古人法書名畫以自樂前後監司守令熟公名者時時欲交權
公公不屑也董宗伯傳策爲國學博時疏論嵩相謫戍廣西諸名
公哀詩送之獨公詩有千言抗疏緣明主萬里從軍奈老親之句
爲人所膾炙云公詩法陶徵君孟襄陽書法虞世南顏清臣俱得
其骨所著有子野集行於世

陸應陽

陸應陽字伯生號古塘卽三浦公子也公少負雋才甫弱冠卽長於古文詩詞真草書法顏魯公間寫歐陽詢索者嘗滿戶外詩宗大歷文宗曾王平生熱腸坦腹善赴人緩急乃無端坐友人事註誤衆皆扼腕每傷古道日偷士風不振力欲挽回狂瀾逞逞形之意氣激烈而位卑言高動罹薄俗非笑公亦不爲意客游南北十餘年足跡幾半天下縉紳公聞雲間陸伯生至輒倒屣傾蓋公益自珍絕不干以私興甚豪舉嘗自傷數奇不爲造物所憫則舉杯而問之曰天乎天乎何使陸生至此故公客長安有詩文名有狷介名有酒人名且爲申許二相所推轂足稱雲間高士所著有游燕集行於世

范叔子曰伯生與予同游鬢序卽督學耿公所取士也其間奮翼

巍科者幾二十人獨予與伯生爲老博士然皆能以古文詞表見於世伯生猶善客游其所歷覽名山大川逞逞賦之詩歌以據其牢騷拂鬱之氣亦雄矣哉乃所謂奮翼巍科者先天折四五人與草木同腐者又幾七八人倘以吾兩人較之昌黎氏所謂孰得孰失必有能辨之者

余采

余采字元亮號秀州先世方正學先生之後革除間避居海上公剛毅有志操面折不容人過亦不妄取人一錢庠中後進望若嚴師常與婺士同舟其人道卒公出貲斂之終不責報倭亂時寓郡城每同家君閒步忽遇少婦冶容者公面壁避之家君問其故公答曰目不視邪色其生平嚴正類如此僅以需貢作教樹立多名士云

朱察卿

朱察卿字邦憲號醉石公早歲卽厭薄經生志在不朽業事母兄
孝敬備至生平重干進多義俠有監軍使者故常德其父福州守
豹風使奏謁當以軍功起家公謝去族人寒士待公舉火者傾橐
濟之無吝容王司寇鳳州常比公郭林宗徐孺子云公銳情著述
文逼西京五七言時婉麗爾雅具體錢劉有邦憲集十五卷行於
世

張昉

張昉字元昃號友蓮公負雋才力貧苦學宗歐曾五七言詩典則
有大歷風尤長于選真草書臨摹山水皆得晉元風骨性不嗜從
王公大人市蜉蝣之譽故行年七十無所知名邑令屠長卿思一
見其人而索書畫手卷以釀金三兩爲壽公謝卻之卒不往見蕭

然一身不能濟餒陸大行彥章爲假居僧寮一椽時佐酒米公曰
此賢者之惠也不妨吾廉郡人兩高之

范叔子曰身將隱矣焉用文之古人重高士良有以也今之托名
山人者何比比哉乃迹寄林泉心懸富貴旦暮奔走射利沽名而
叩其中且空空無當於用是陽慕山人而陰濟其小人之私也媿
之矣媿之矣予觀昉之才藝足稱名家乃能隱約沒齒不求聞達
卽以方之爰旌木鮑焦諸賢寧甘立稿獨耻干求者奚讓焉故予
每見昉必稱曰眞山人

孫得原

孫得原字本卿號雁洲公少有俊才治舉子業二十而病羸支離
一床者五年遂棄去故業以詩歌自娛尤工篆隸雜楷縉紳間絕
愛重之時時籃輿過公說詩問奇公以病足不能行縉紳遂釀錢

買一蹇驢給之郡中故無騎驢者騎驢自公始故驢跡所至兒童
嬾女皆呼策驢山人云公又以孝稱事母魏孺人雖晚年猶依依
膝前孺子慕也詩有黃山谷蘇東坡遺音精舍一椽左圖右史者
四十餘年而卒

陸宗行

陸宗行字伯與號家山公弱冠補博士卽究心濂洛關閩之學而
旁及于內外陰陽九流諸子百家冀爲通儒已慕太史氏遨遊四
方之志擊楫渡江走桑乾太行歷燕秦晉魏故墟弔古偉人傑士
之墓欲從武弁中當一面以試其奇會數奇敝裘帶索以歸築室
于放鶴灘雜植名花怪石箕踞吟嘯其中所詠有不羈天地闊無
事日月長之語公多巧思常製一畫舫外列爻象內具茶鑑酒竈
六博棋枰之屬每乘舫探奇雖窮鄉兒婦咸嘖嘖呼爲家山先生

公善琴又工樂府興至輒浮白浩歌幾失天地自比於嵇中散桓
江州云晚年會馮廷尉公季子敏卿舉進士爲兵部郎卽公表弟
也一日顧謂妻子曰天豈眞虛生我耶吾氣尙壯不忘擊筑探丸
之懷矧有弟在燕中吾將一往得盡交天下賢豪長者而幸于一
遇庶不負此生其如征橐何乃出所幸姬鬻之策劍趣長安竟無
有知公者因窮愁旅邸以死敏卿聊爲脫驂扶櫬歸之識者扼腕
范叔子曰予嘗讀王文成公瘞埋文見一吏目携一子一僕赴官
于煙瘴毒癘之鄉三人一朝死于途時文成公謫爲驛吏命童子
持錘往瘞之因爲文欲招其游魂而還之故鄉又悲所謂吏目者
卽偕子僕食力于家未必凍餓以死何至徇升斗之祿而死非命
乎夫吏目徇升斗之祿以死文成公猶且悲之今家山先生所徇
者安在哉而乃同于吏目之死非命也假令文成公目覩先生之

變其爲悽愴之詞以吊又可知矣予今老矣平生坎坷大都與家山同獨能以義命自安而不役役于窮途自謂加家山一等云

范允謙

范允謙字牧之號笏林舉隆慶庚午鄉薦公多才情天而客死其子象宣屬山人陳繼儒爲外傳予特附錄之令讀者知公爲當代逸品云陳繼儒曰余宅鄰牧之少聞牧之以情死不敢問父老比十年奉化人之教畧已定情乃始許牧之子必宣作牧之傳范生牧之名允謙伯父太僕父光祿爲文正忠宣公後牧之復以庚午舉鄉進士生而頎廣額頤頰而下小削目瞳清熒骨爽氣俊不甘處俗華亭世家子出必鮮怒錦衣狐裘舞于車上童子駢肩而隨簪玉膏沐如婦女之麗牧之見之往往內愧肉動毛孔蝟張輒障面去牧之居恒單衫白帽着平頭弁與諸少年頡頏而游游遇豪

貴人牧之欠抑唯諾陽嗛不敢言衆以爲是生也寒酸不上人眼意輕之牧之迺快或坐客小覺則拂衣疾趣出亟遣追呼者問牧之飄風逝矣性嗜書無所不讀能跳梁于翰墨間有才子致客非韻斥門者不納納必以名香清酒爲供或晏語夜央喜不嗜寐童子更燭割炙復張具如客初至時屋下雞鳴猶聞鼓琴落子聲及醉而嘯者至是四方之客日益集牧之恢張心胸厚往薄來故襟實亦稍稍得進而未幾杜生之事起杜生者妓女也以風態擅名慷慨言笑自題女俠與牧之一遇于閭門目成久之退而執手嘆曰吾兩人得死所矣君勝情拔俗余亦俠氣籠霄他日枕骨而葬太湖之濱誓令墓中紫氣射爲長虹羞作泖渙女兒下指鴛鴦上陳雙鵠言罷大泣衆驚其不祥嗣後淹繫旬月無復顧禮毀頓精神廢輟家政客乃有爲文告神以絕牧之者牧之荅曰僕聞虧名

爲辱虧形次之諸君子具當世賢者僕雖不才忝惠莊之遇舊矣諸君子一旦攝齊束帶矢之神前擊鐘伐鼓以絕鄙人一時觀者莫不駭遽狂走謂僕當得夷族之禍以至於此甚而造作端未飛流短長筆之隃糜付之尸祝無煩檢考遽定爰書不須左驗遂成文案是忠告之義同於撻挾摺撫之過近於文致使僕不能含生於覆載強息於世人辱云甚矣僕亦何人其能甘之惟有蹈東海而死耳牧之旣深情膠粘不解而復爲諸客所激若圓石遇坂轉觸轉下勢不得不與俱盡會太守窘杜生出辱之庭牧之忍愧以身左右翼多卑詞太守徘徊不令下鞭然終不許牧之以一妓女燼黜賣杜爲賈婦牧之佯諾陰使人贖山西賈得之以藏於別第俄載而與俱長安居長安不三月牧之病肺死牧之旣死杜生敕家人裝其喪歸而以身從杜入舟忽忽微嘆間襍吟笑如無意償

范者至江心命具浴浴罷更衣左手提牧之宣和硯右手提棋楸一躍入水左右驚視不能救初見髮二三尺許浮沉旋瀾中已復颺起紫衣裾半褶復轉睫間而生杳然沒矣余聞牧之事光祿公秦淑人及遇弟允臨斤斤孝友名教人也因緣爲崇卒耗俊姬何哉漢高項羽英雄絕世劍鋒淬人眼不爲貶乃心銷神枯終不敢斷虞戚之愛夫二公賴有此舉小足破俗不然項乃倔強老革龍準公一村亭長故態耳語曰天下有心人盡解相思死世無真英雄則不特不及情亦不敢情也牧之者得無老氏所謂勇於敢則殺者歟定盟且誓永焉不諼沉恨幽疑泮然渙釋兩人可謂誠得死所矣使杜遲回獨生或不欲生而無幸以不汙病死寥寥千古含怨何期今而後知杜生之有以謝牧之也或曰君家蠡首倡風流而唐杜牧之奇宕桃達半臥粉黛中以老君子于牧之則諱姓于

蠡則諱名垂二千載而合爲范牧之嗚呼然與否與贊曰余與牧之子象宣游生駒俊鵠抑何其似牧之也象宣入國門而遇平康里則疾回其車市有倚門而挑者耻若面黥惟恐唾沫形影之及象宣少孤心不能記牧之短長肥瘠而能不失尺度如是父豈必身爲教哉夫曾子子父之相反而趙括之讀父書也爲人後者其奚擇也

倪邦彥

倪邦彥字伯獻號藹寰綺歲卽沉靜好學志操不群弱冠由博士入貲爲國學生以數奇八躡棘闈遂謁選授光祿大官丞會穆廟覃恩得封乃考新溪公有子甫英業領順天鄉薦公喜曰新沽龍命子列賢書可自慰矣奚必躋巍陟臚爲也旋擢桂林別駕卽致政歸居鄉嫉俗之誇嚴蕩軌淫窳澆墮欲以古道力挽之因更號

一溉子取嵇中散所謂爲稼于湯之世必一溉者后枯之義也以故賑貧恤孤不惜傾橐有平仲希文之風遇寇起海上議城役兵與有司計無所出公首義曰卜式賈人子耳猶能爲縣官輸粟實邊况吾輩耶卽捐貲佐之時里中幸免倭患實推公之功嘗倣應休璉之義作百一感篇行於世唐太史文獻讀之比於蟋蟀簡兮諸篇識者服其知言云今孝廉公益樹懿行聲籍士林人稱爲仁者之後

錢廉

錢廉字貞夫號介石吳越武肅王裔公性嗜學雖治詩然易書禮左氏春秋無不精研背誦無漏弱冠補博士試輒高等竟八困棘試督學楊公嘗手其卷嘆曰子其文忠李廣乎僅以應貢得豐城教尋轉會稽公訓士以經學爲先士皆驚詫曰公豈康成夏侯高

唐公穀合爲一人乎再轉教授鄴臺鄴臺必走陸可至而公事母沈孺人至孝時孺人春秋高公嘆曰昔王陽迴馭非以親故耶吾奈何忍挾母氏陸走黃塵以苟升斗也遂投劾歸生平醇謹專愨不與物忤雖御子弟僮僕未嘗輕加迅厲所著作甚富子姓皆奉公命不付劖劂以是無傳者病篤猶無日不晨起櫛沐衣冠談書史一日命其子良輔良軫講鄒孟子登東山章極言紫陽訓詁語已得曹溪汗下悟矣竟掩卷端坐拱手而逝已復徐開目曰死生之際其究竟若此哉遂歿人以爲公得蟬蛻云

陸從大

陸從大字履貞號寶峯有雋才弱冠卽以儒士領嘉靖丁酉鄉薦辛丑成進士補福清令值海溢民飢捐俸賑之歲大旱禱雨雨輒應士民哀公所作喜雨頌及民間謳歌爲如郊錄行於世時守令

未有久仕者公獨以士民借寇衆令清七年始轉廷評尋陞工繕主事會廷推公妙詞翰遂奉旨同張某等七人更直制勅蓋一時異數云竟以京師大疫夭于官公重義好施不啻飢渴有同年孫某謁選客亡公脫驂賻之歸其二子里人張某者遊閩中訪故舊黜不納幾乞於市公宦其地哀而收之捐俸三十金爲治裝歸內戚某嘗以產售公伺公之官輒盪乎其產公亦不爲計以故捐館之日宦橐如洗時論高之所著有詩文如干卷藏於家范叔子曰張某困閩中事父老至今能道之然皆稔稱公而切齒其斥張者時公乃天而遺孤彼其子方貴且盛矣倘所謂無天者非耶未幾而斥張者赤族之禍起公二子曰萬言萬里者竟崛起襁褓克紹公家聲而孝廉君孝友之德尤光里閭嗟嗟孰謂天道果遠乎哉

潘允哲

潘允哲字伯明號衡齋登乙丑進士爲新蔡令高等調煩義烏令
囹圄中縲囚爲空青草蔽地徵爲南御史所建白大計皆著爲令
守齊安民嚴之如鬼神擢副使督學關中故事外臣不得乞休沐
假公一日從郵中得父恭定公手書語多失詮次公心動曰翁其
殆乎卽解印綬歸同官者覺而覓公則跨一款段出關久矣中途
果聞訃哀毀骨立未抵家五十里輒號跳而前哀動道路其治母
夫人之喪亦然家居布衣蔬食遇者不知其爲憲副公也人有緩
急於有司屬公居間者公陽却之而陰爲緩頰白其冤狀不令其
人知也人或竊知從公謝者公輒面赤遜謝無有也應門傳刺僅
一老蒼頭仕宦二十餘年又爲恭定公元子家徒壁立戊子歲稔
米價騰踊公時時不給以故鄉黨間無不頌公者卒之日知與不

知皆爲流涕丹旆所過父老爭插竹挂紙錢其上自公家達墓所
凡二十餘里家至戶到又共爲詞謠集諸子弟歌爲變徵聲以佐
薤露其詞曰民有秉彝原好德長公雅度何溫克早歲賢聲徧鄉
國旣登朝貴無驕色身章悃幅厭華飾禮度謙謙心翼翼公之存
兮共矜式公之歿兮咸嘆息仕兮未躋樞鼎職齒兮未屆耄耄或
積之豐兮報之嗇胡天夢夢不可測竹枝森森沿道側紙錢飄飄
豈易得三代民心此遺直音聲悽朗一唱百和觀者填途塞巷至
軼靈輓不得行其感人之深若此蓋海上一盛事云
范叔子曰余所紀一時人皆就其不得志于時者衡齋公旣以蚤
歲登進士仕列金紫恭定公爲之前方伯爲之季子人生足矣則
何以入紀也曰以志造物之變也以志人心之猶古也余辱與方
伯公友善得衡齋公隱德爲詳以公之德卽官至台鼎壽躋耄耄

何所不可乃祿不配德壽不配名悲矣余又觀吾鄉數年來風頑俗薄盜跖夷齊往往倒置而上海尤甚然公喪也担夫紅女無不嘆息泣下至挿竹之事幾足與雷陽並傳非所謂三代遺民也耶余故重惜公且以公爲世鏡也因捉筆紀之方伯公宏于經濟朝野傾注與公同宦橐如洗好行其德亦與公同獨祿位稍顯晚年林壑自娛名壽方悠悠未艾予故未敢入紀云

